

LESON 1

Kreye yon fichye konvèsasyon

SA POU W FÈ: Kreye yon fichye k ap sèvi kòm baz pou dyalòg w ap pwograme ki pou fèt ant yon moun ak wobotchat ou a.


FASON POU W FÈ SA:

- **Kreye yon fichye tèks.** Itilize yon pwogram k ap pèmèt ou tape tèks senp. Pa itilize yon pwogram trètman tèks avanse tankou Microsoft Office Word oswa LibreOffice Writer.
- **Dedye fichye tèks la.** Nan premye liy fichye a tape:

```
! version = 2.0
```

Liy sa endike wobotchat la ki vèsyon Rivescript pou l itilize. Rivescript se yon standa ki pèmèt moun pwograme sèvo yon wobotchat

- **Anrejistre fichye a.** Anrejistre fichye a ak yon non senp. Ajoute ekstansyon “.rive” nan non fichye a. Konsa wobotchat la ap ka itilize fichye sa pou l chèche repons pou l bay.

-  Nan nivo sa a, wobotchat la poko ka fè anyen paske fichye a poko gen kòd k ap pèmèt wobotchat la fè dyalòg ak yon moun. Nan leson 3 n ap egzamine ki fason pou nou fè sa.

LESON 2

Bay wobotchat la yon idantite

SA POU W FÈ: Prepare alavans enfòmasyon k ap itil wobotchat la pou l prezante tèt li oswa bay yon detay ki gen rapò ak idantite l lè yon itilizatè mande l li.

FASON POU W FÈ SA:

- **Kreye yon fichye konvèsasyon.** Itilize enstriksyon ou te aprann nan leson 1 an pou w kreye fichye a epi dedye l ak wobotchat la.
- **Kreye varyab idantite yo.** Pou chak varyab ou vle kreye, tape nan yon liy poukont li
! var *[non varyab]* = *valè varyab la*.
Non varyab yo dwe senp epi yo dwe reprezante enfòmasyon ou vle wobotchat la itilize pou li prezante tèt li. Men yon egzanp pou bay wobotchat la yon non ak yon adrès.

! var non = Alva
! var lokasyon = Ayiti
- **Anrejistre fichye a.** Bay fichye a non **begin.rive**. Pa konvansyon, fichye ki gen idantite wobotchat la gen non fiks sa.

LESON 3

Pwograme premye dyalòg ou

SA POU W FÈ: Kreye kòd ki pou ede wobotchat la konnen kijan pou li reponn lè yon tilizatè voye yon mesaj ba li.

FASON POU W FÈ SA:

- **Ouvri oswa kreye yon fichye konvèsasyon.** Ouvri premye fichye ou te kreye a. Si w potko fè sa, itilize enstriksyon ou te aprann nan leson 1 an pou w kreye yon fichye epi dedye l ak wobochat la.
- **Ajoute yon kle ak yon repons.** Yon kle ak tout repons li sanble konsa:

+ bonjou
- Bonjou etranje.


Kle yo koresponn ak mesaj wobotchat la resevwa. Yo se mo, fraz oswa senbòl wobotchat la ap tann pou l chèche epi bay yon repons tou prepare pou mesaj li resevwa a. Yon kle toujou kòmanse avèk yon siy plis (+) ki devan mo, fraz oswa senbòl ki reprezante mesaj itilizatè a voye a.

Lè yon liy kòmanse ak yon siy mwens (-) sa vle di “sa itilizatè a ap resevwa”. Nou rele sa repons. Plis nou mete repons se plis nou pa limite wobotchat la nan repons li ta ka bay lè li resevwa yon mesaj ki koresponn ak yon kle.

Si ou vle pou wobotchat la chwazi ant plizyè repons pou li bay itilizatè a, ou ka ajoute kèk liy repons anplis nan fichye a tankou konsa:

+ bonjou
- Bonjou etranje
- Hey, ou tounen. Bonjou
- Bonjou zanmi mwen

- **Anrejistre fichye a.** Anrejistre fichye a. Si se yon nouvo fichye, l ap mande w pou w bal yon non. Pa bliye ajoute ekstansyon **.rive** la.

-  Gen kèk règ ou bezwen toujou sonje lè w ap defini yon kle ak tout repons ki mache avèl.
 - Yon kle pa dwe gen ni siy ponktiwayon ni lèt ki gen aksan ladan l.
 - Yon kle dwe toujou ekri an lèt miniskil.
 - Repons yo nan bò pa yo ka gen siy ponktiwayon, lèt ki gen aksan ak lèt majiskil